



等集眾德三昧經

西晉三藏法師竺法護譯



清刻龍藏佛說法變相圖

等集衆德三昧經卷上

化五

西晉三藏法師竺法護譯

聞如是一時佛遊於維耶離大樹重閣精舍
與大比丘衆俱比丘一萬皆學戒具足曉了
聖達菩薩二萬悉不退轉逮諸總持辯才無

化五

礙悉得神通分別解暢定意所行心性進止
而甚堅強懷來智慧善權方便度於彼岸其
名曰意行菩薩吉意菩薩上意菩薩持意菩
薩增意菩薩金剛意菩薩無限意菩薩法意
菩薩慈氏菩薩溥首菩薩鉤鎖菩薩釋梵四
天王及諸天子萬四千人亦皆來會爾時世
尊與無央數百千之衆眷屬圍遶而爲說經
欲放軀命自期三月當取滅度鉤鎖菩薩即
從座起更整衣服偏袒右肩長跪叉手而白
佛言甚哉如來欲捨壽命期於三月當般泥

洎世尊惟說諸菩薩護菩薩救攝菩薩所說
菩薩所現菩薩所殖衆德之本不斷佛教將
濟法眼恩惠聖衆不捨群生爲講說法超無
爲道如來滅後法澤廣被菩薩大士不廢無
上正真之道常不離佛聽經供僧而立要志
心意堅固遵法散誼其念所趣靡不覺達體
解所歸多所殊越恒懷慚恥自淨無犯所慮
慷慨威儀具足所建勇猛降制勞穢伏諸欲
垢無所畏憚遊于衆會而不忘難衣毛不豎
惟天中天云何菩薩大士進益衆德不乏智
慧不違禪定所慕道心未嘗缺廢內性弘毅
結友究竟至于滅度言行相副所遵佛法無
有邪偽常護正戒所聞不惑攝淨三禁而常
忍辱每行等心無有暴慢向於黎元善修精
進心無懈怠諸所應行一切成辦一心行禪

其意安詳曉了正受一切所湊志建智慧離
于邪見六十二疑於諸訓典明練光達離所
當救納而行四恩弘濟多護天上世間遠離
所樂常念無常心如門閭住諸通慧意不存
慕聲聞緣覺光闡法教降制魔怨及諸外道
念宣法王所講風化崇順法誨不求天人如
佛之教以法爲業不貪衣食無有愛欲廣度
一切釋除恚恨愍哀群生消却愚癡於一切
諸魔埃垢行權方便無邊之慧部分普勸佛
告那羅延此言力士菩薩曰善哉善哉多所
哀念多所安隱愍傷諸天世間人民乃問如
來如斯之誼諦聽諦聽善思念之當爲仁說
菩薩大士所行殊特無量之德鉤鎖白佛願
樂欲聞鉤鎖菩薩及與衆會受教而聽佛言
有三昧名等集衆德假使菩薩逮斯定者衆

德進益不乏智慧不違禪定所慕道心未曾
闕廢心性弘毅未嘗離佛恒聞經法供養聖
衆行于四恩彼如是已不捨群生於時世尊
咨嗟等集衆德三昧宣揚其名默然無言是
時維耶離大城中有力士名維摩羅唎移

此言離垢威

心自念言吾爲力士於斯天下力勢

強盛無有倫匹曾聞沙門瞿曇猛勢無量其
力巍巍總要有十體諸骨解猶如鉤鎖而得
自在吾欲往試觀銓其道於我孰愈念已尋
出維耶離城往詣大樹重閣精舍欲觀世尊

化五

三

而見如來與無央數百千之衆眷屬圍遶而
爲說經照臨大會猶如須彌超現大海瞻觀
威容神曜光光心懷踊躍不能自勝稽首佛
足却坐一面佛知力士心之所念欲爲療除
憊慢貢高自用之穢便告賢者大目犍連吾

憶往昔爲菩薩時兄弟睹射彎弓放箭箭所
至處汝今攝取釋女瞿夷欲充所用目連對
曰唯然世尊於時不見箭何所湊佛放右掌
光光照三千大千世界於斯佛土鎮世鐵山
大鐵圍山箭徹其中目連尋光乃見箭處佛
告目連寧見箭乎對曰已見又而告曰往取
箭來時目犍連自現神足一切衆會莫不見
者如勇猛士屈伸臂頃斯須即到鐵圍山
欲拔我箭三千大千世界皆爲震動而箭不
搖一切諸會天龍鬼神帝釋梵王靡不肅驚
阿難整服長跪問佛地何故動普世惶悸佛
告阿難憶吾往古睹射放箭箭徹鐵山使目
連取盡其神力箭不可拔三千大千世界乃
爲之動而不能得阿難啓曰惟垂尊援佛即
許之援以道力則承聖旨攬拔得箭還用進

佛目連白佛云何世尊爲菩薩時賭射放箭
箭徹鐵山用父母力神足力乎佛告之曰是
父母力非神力也假用神力其箭當達無量
無限諸佛世界目連又曰云何菩薩以父母
力射箭乃入鐵圍大山道力功德而佐攝取
何以爲喻佛告目連十凡象力則不如一正
象之力十正象力不如一龍象力十龍象力
不如一大象力十大象力不如一術事象力
十術事象力不如一青象力十青象力不如
一普妙象力百普妙象力不如一大巨象力
化五
百大巨象力不如一力士力百力士力不如
一大力士力百大力士力不如一上力士力
百上力士力不如半鉤鎖力士力百半鉤鎖
力士力不如一具足力士力百具足力士力
不如一大鉤鎖力士力百大鉤鎖力士力不

如一法忍菩薩力百法忍菩薩力不如一究
竟菩薩力百究竟菩薩力不如一一生補處
菩薩功德之力適生墮地則行七步佛言目
連他方世界現在諸佛建立佛土究竟菩薩
之所遊處適生墮地行七步者其地下至六
百八十萬由延盡斯下已乃得水界各各分
別其水滴如車軋上至梵天承佛威神愍哀
衆生世界不損無所燒害究竟菩薩威神勢
力巍巍如是十究竟菩薩力不如如來至眞
等正覺力是謂世尊父母之力其諸菩薩宿
命德本所受之決亦非神足道力變化設使
菩薩示現神變功德之力往詣道場坐佛樹
下以神足之力一足指舉江河沙等世界先
以目前用置殊異無量無限諸佛國土其於
衆生無所燒害是爲菩薩神德變化足一指
化五

力如來神足變化之力復過於是無量無極不可思議假令如來普具示現神變威力汝等觀之則不能信何況外術衆邪異學又目捷連菩薩往詣佛樹下時攝四大種立爲一種已立一種在於世界無有增減於時弊魔行到道場與無數億百千官屬凶悖難當如來一切尋摧伏之何以爲一謂平等力有十力常加大慈哀諸衆生無所毀觸何等十力有處非處有限無限如審悉知過去來今如審悉知一心脫門定意正受如審悉知見諸人根種種別異如審悉知見他群生心意所念如審悉知若干種身無數形體如審悉知衆庶所行者好醜不同如審悉知道眼徹觀終始所趣此沒生彼彼沒生此名字種姓父母兄弟其身口意行惡誹謗聖賢邪見顛倒

終墮惡趣其身口意行善不謗聖賢正見奉順終墮善處如審悉知道耳洞聽天人世間地獄餓鬼蜎飛蠕動蚊行喘息十方諸佛世界若此言聲亦無音響亦無所著如審悉知心觀五趣一切本際諸漏已盡無有塵垢終始悉斷神真聖達解名色原如審悉知是爲十力如來之力復過於此不可思議暢徹十方無去來今於是離垢威力士從佛世尊聞斯菩薩父母諸力歡喜踊躍怪未曾有善心生焉即從座起偏袒右肩長跪叉手白佛言今我聽受世尊所說爲菩薩時父母之力及十種力屏除貢高憍慢自大歸命三寶願發無上正真道意愍傷衆生使獲大安哀令我得十種諸力如天中天具足無異時會大衆聞斯力士誓願弘廣滿十千人發無上正真

道意同時舉聲而歌頌曰

僥令我等逮得道力亦如如來至真正覺
於是鉤鎖菩薩白世尊曰今者大聖何故稱
歎等集衆德三昧而便默然惟願如來分別
講演等集衆德定意宣暢菩薩大士諸行使
發意者逮得斯定佛告力士菩薩初發意者
欲至無上正真之道當受尊定所以者何若
初發意受持尊定尋具普入一切衆德譬如
力士川流泉源江河大流悉歸于海所殖功
德布施持戒所習平等思惟道慧有漏無漏
俗業度世天上人中所立福祚皆來歸湊於
初發意菩薩之行是故族姓子族姓女欲攝
衆福當發無上正真道意譬如須彌大山鐵
圍山雪山黑山諸藥草木及餘叢林州域大
邦郡國縣邑并四天下日月運照包在三千

大千世界如是力士其凡庶履跡無著緣覺
衆祐菩薩如來聖大之德其初發意爲菩薩
者悉得通入於此福祚以是之故當作斯觀
若發無上正真道意則悉該攬於諸德矣佛
告力士譬如四域群生之類轉輪聖王居爲
尊上功祚殊勝使四天下衆庶人民福如轉
輪聖王之德等無差異合集斯福巍巍之德
爲一聖王使三千大千世界衆生之德各各
皆如轉輪聖王一一聖王使倍三千大千世
界衆生之數總集諸福爲一人德使江河沙
等諸佛世界所有人民各各履祚如彼一人
於鉤鎖意云何寧能限量斯福德乎鉤鎖對
曰惟天中天計聖王德不可思議何況一切
爲轉輪德莫能稱限世尊告曰正使撰合此
衆生德無量之祚以比發意菩薩功勳百倍

千倍萬倍億倍巨億萬倍計空不及無以爲喻是爲初發意菩薩等集衆德三昧第一所入佛告鉤鎖譬諸梵天於千世界悉樂行慈若復有人皆以七寶滿千世界以用布施比千世界梵天行慈行慈之福其德殊勝若三千世界至于五千十千若至百千世界梵天普共行慈若以七寶周徧充滿百千世界以用布施所殖德祥以此百千世界梵天行慈行慈福多不可稱限正使三千大千世界衆生之儔其福德如百千世界梵天行慈行慈心普向于群萌計其福德比初發意行者所尊慈祚百倍千倍萬倍億倍巨億萬倍計空不及無以爲喻所以者何其初發意志於無上正真道者德不可限以是之故當作是見當作是知假使能發大道意者則爲具足一

切衆德若族姓子族姓女欲得周滿無量之祚當發無上正真道意佛言力士是爲等集衆德定意第二所入佛告鉤鎖東方虛空所覆世界空之遠近可限量乎答曰世尊無限無量不可計數無有邊際天中天佛言如何化五引喻智者解趣十方世界虛空所覆不可盡極猶若等集衆德定意福祚功德超彼無量轉加具足爲衆生故以諸道德將護其心以大精進成滿所行假使有人於此三千大千世界下盡水際上至三十三天滿中芥子一芥子爲一佛國過於東方若干佛土著一芥子各各如是令芥子盡不能窮極東方世界設令江河沙等世界滿中芥子有人盡取芥子一一破碎各如江河沙數芥子之限於鉤鎖意云何寧有人能籌計分別知所破碎

芥子數乎鉤鎖答曰惟天中天破一芥子所分之限假使智慧如舍利弗周滿天下閻浮提土一劫之中籌之計之不能稱量芥子之數何況欲知江河沙等世界破芥子數設令有人過諸佛土芥子著一芥子如是之比令

彼芥子悉盡無餘東方世界不可窮極得其邊際南方西方北方東南方西南方西北方東北方上方下方亦復如是如是鉤鎖如十方界所有虛空諸佛國土皆以七寶徧布其中悉令充滿盡用布施所得功德豈多不乎化五鉤鎖白佛甚多甚多天中天無量也世尊告曰其初發意菩薩行慈之德過於彼施滿于東方無限世界七寶之福百倍千倍萬倍億倍巨億萬倍計空不及無以爲喻譬如虛空無有能度得邊際者菩薩之慈猶如虛空無

所不覆菩薩如是所行大慈所蓋無際譬如衆生受形立體所周佛土所在世界若干之數菩薩行慈使此群萌皆得成就爲轉輪王具足功德如釋如梵踐祚之數又計菩薩大士建立淨性質直無諂欲度衆生住於大哀常行慈愍所行七步攝取功勲超諸群黎爲釋爲梵轉輪聖王之福慶也百倍千倍萬倍億倍巨億萬倍計空不及無以爲喻是謂等集衆德定意第三所入佛告鉤鎖三千大千世界一切衆生威神功德皆令巍巍如轉輪王如釋如梵功福之慶不比發意菩薩之慈正使一切十方衆生皆爲釋梵轉輪聖王百千億倍不比菩薩行大慈哀又使三千大千世界衆生之儔一切皆使如清信士所有功績比舍利弗福慧之明百倍千倍萬倍億倍

巨億萬倍不相及逮正使三千大千世界滿中人衆如舍利弗智慧功德等無有異以方比於緣覺智慧功德百倍千倍萬倍億倍巨億萬倍計空不及無以爲喻縱使三千大千世界遊居衆生一切咸具緣覺之德智慧功德等無差特欲比五劫生行菩薩百倍千倍萬倍億倍巨億萬倍計空不及無以爲喻是爲等集衆德定意第四所入說是經時二萬二千人皆發無上正真道意三千大千世界六返震動其大光明普照世間億百千姪化五諸天妓樂不鼓自鳴而雨天華覆蓋道場紛葩佛上周徧衆會積至于膝釋梵四天王天龍鬼神皆歌歎言唯然世尊族姓子族姓女心懷至誠而發無上正真道意如向大聖所講說者我等稟誼假使不發大道意者終不逮

成等集衆德定意正受況當能致一切功祚無量乎是時離垢威力士白佛言唯然世尊當行何法而能成就逮得等集衆德之定乎佛告族姓子有一法修致斯定何謂一發心調習諸通之慧是爲一法逮得斯定復有二法修獲斯定何謂二若聽聞法諮稟無厭如所聽受思察其誼是爲二復有三法修獲斯定何謂爲三消損諸惡勸進善業殖衆德本是爲三復有四法修獲斯定何謂四禁戒清淨所見清淨其心清淨智慧清淨是爲四復有五法修獲斯定何謂五所言至誠志性堅固其意質朴而無諛諂其心清淨建立無差常以等心一切衆生是爲五復有六法修獲斯定何謂六歸附善友遠離惡友捨廢衆會習寂宴坐順行大慈愍傷衆生是爲六復有

七法修獲斯定何謂七建立寂然分別惟觀
除于報應將御緣起離求所見曉了罪福悉
由牽連導利結礙使至平等入于道誼用道
法故忍於恚罵而無恨心是爲七復有八法
修獲斯定何謂八身行懺怕口言靜默心惟
寂寞觀痛痒察諸法惡本未起而不想念今
不復興惡本盛發隨念蠲除善本未起思順
令滋善本熙隆將養護之是爲八復有九法
修獲斯定何謂九觀過去法而知無常於當
來法而無所生今現在法而無有二逮入三
世而悉平等一切諸法猶如法忍不著於空
分別無相離於所願設使所生有所救護是
爲九復有十法修獲斯定何謂十脫於無我
忍於無命了於無人無常句跡一切所生皆
爲苦患無爲寂然則爲救護離顛倒度衆生

順典詰如所聞法尋即奉行佛告離垢威是
爲十法菩薩所行因此逮得等集衆德三昧
之定離垢威白佛言菩薩大士積累功效無
極大德乃得逮聞斯定意耳欲決諸德正眞
之行當聞斯定欲得獲暢不可思議功祚之
福當聞斯定欲令大寶無有盡耗當學斯定
離垢威復白佛言菩薩大士以何逮得無盡
之福德如大海度不可思議功祚不廢佛告
離垢威菩薩有三事逮無盡福德如大海度
難思議功祚不廢何謂三一曰好喜布施二
曰護持禁戒三曰博聞不倦是爲三彼族姓
子何謂菩薩好喜布施不當貪財不當以物
誘進教化假使有物不肯施與受者不當受
其物也設使受者不捨所取不當勸御彼等
眷屬設使乞者有所求索發無受心不可勸

化五

十二

化國王財寶產養之業屋宇舍宅假使乞者有所求索其心無異又族姓子菩薩大士當發此心我爲一切衆生之故惠施軀命若有人來欲有所得象馬車服頭目髓腦眼耳鼻口支體手足肌髮肉血隨其所求各各施與心不懷恨忍辱施與旣有所施不望其報所可惠捨無所貪慕供給衆生衆生獲恩得給所乏從是已往所欲攝取群萌之類得佛道時爲說經法令得速解設族姓子若有菩薩發心如是是謂菩薩不惜身命若沒其體不犯衆惡不害生命以養其身不以命故犯於不善不以財業越毀他人不以眷屬熾盛怨訟鬪諍不危他子以育妻息已所不喜無加於人已知止足則發一心志不喜樂諸不善事況當復犯若干之非除貪嫉棄衆惡常知

止足行於真正無有異心則速平等速平等已無有衆邪則獲慈心已習慈心便遇善友已得善友則便得聞寂然之法已聞寂然便建立行已建立行則化衆生化衆生已則便講說立寂然誼假使菩薩不爲衆生不修寂然則不微妙已北五不微妙不獲道眼不得道眼不至善權不能覩見一切衆生根本所趣是族姓子菩薩好喜行布施者得廣名聞復過於斯不可稱限復次族姓子觀內外法念之一等察其內地及省外地而無有二所以者何是身如草木瓦石之類無異無人無有想念無有堅固四大合成假使有人斷截破壞掇取持去不得自在莫起想念勿得貪身無惜壽命吾不恨彼於其所起恚意也益加慈哀向彼衆生譬如族姓子有大藥樹掘取

其根莖節枝葉華實樹不念誰取我根莖枝
葉華實亦不念言莫取我根莖枝葉華實其
藥樹者一切無念亦無所想亦於衆人無所
恚恨其疾病者服藥則愈如是族姓子行菩
薩者當自觀身四大爲家猶如藥樹其有衆
生欲得我身頭眼體節支幹手足髓腦血肉
恣意與之如是族姓子菩薩所施其德無盡
作是施已爲慳貪者欲令惠施故勸助之其
貧窮者化示大財其少福者化具足德未發
道意令行菩薩勸誨善本欲令清淨一切福
慶勸化衆生導以清淨以是布施疾近於道
得至無盡何謂布施盡菩薩布施有四事盡
何謂四不好勸助不喜說法願生卑處樂近
惡友是爲四復有四行菩薩布施疾近於道
何謂四多所勸助行權方便建立於法習近

善友是爲四復有三法菩薩布施不爲虛妄
何等爲三發菩薩意多所愍哀攝護一切衆
生之類諦受奉行如來教命是爲三菩薩欲
施當建三法何謂三住佛法立精講勸衆生
使存大安是爲三菩薩復有二事不爲虛妄
誠審布施何謂二大慈大哀是爲二菩薩復
有二事有所吝施何謂二慳貪嫉妬是爲二
菩薩復有二法布施有所歸何謂二智慧具
足聖達周滿是爲二菩薩復有二法布施有
所趣何謂二至無盡慧趣無起慧是爲二菩
薩所施有四法何謂四布施等與亦不想報
調定安寂所施具足欲成其道是爲四菩薩
所施以是之故自然得趣無盡德海若有菩
薩欲備德海則當習行如是像施精進之行
離垢威力士白世尊曰未曾有也天中天如

今如來分別講說諸菩薩法諸佛經典之所持護菩薩大士作是行者終不毀失正達慧德假使有人如是布施功德之福具足成滿亦當若茲佛言是族姓子審如所云其有發意行施如斯則便歸趣無盡德海則不貧匱

於聖賢業則致大財此之等類具足法財則致大富具足七財無極之德致百福相以莊嚴身為諸群萌福慶之田以給衆生爾時世尊告離垢威何謂菩薩戒德之禁護於禁戒未曾違捨見犯戒者為興悲哀見奉禁者遵

化五

十五

行堅固淨身三護口四淨心三當順奉行此十善事以斯戒法開化他人不自稱歎不毀他人不以禁戒而自褒譽亦不以戒而自憍慢常以禁戒而自調定不釋節限而知止足住於聖賢自護其心見懈廢者不觀其隙勞

來病瘦所施不悔無所希望不以究竟行如所言無所侵犯於諸所行生死之事無所適莫蠲所求望常近於佛而遵慈心若有行慈及無慈者普等救護不失其心不差戒品不志餘乘以斯道乘勸發他人無有不安不事于天一切遠離諸犯戒禁動不安者勸慰使安療除狐疑令不懷恨所生之處而得自在而無適莫所可遊至無所闕減假使所生不以為厭修建精進攝心自檢所行不亂學無所樂亦無所畏是族姓子菩薩所行戒品之業設危身命終不毀戒不以國故而護禁戒不為釋梵天上之尊不為財利報應之驗故及以眷屬豪貴顏貌褒歎名稱亦復不為勢力牀榻坐具病瘦醫藥故而護禁戒不倚於天不貪所生不依内外不慕他人不冀後世

不自著已不著他人亦不貪色痛痒思想生死識亦不怙耳鼻口身心亦復不倚陰種諸入而護禁戒不畏地獄而救濟護不憚畜生不懼餓鬼不爲鬼神不以人間窮乏厄匱故而護禁戒志惟在於建立佛道若聞法者念欲奉行則已効立聖衆之德常欲度脫除生老死憂病懊惱勤苦之患而護禁戒不以財業而護禁戒欲安衆生隱群萌度黎庶脫黏黨樂佛法致差特慕轉法輪將養聖衆不斷佛教不廢法誨不壞衆議而護禁戒也戒

化五

十六

菩薩十法之事何謂十然後當得轉輪聖王之位終不差錯修聖王教奉宣佛道而不放逸臨據帝釋而不邀迭常受佛道而不放逸昇生梵天而不詭異在于梵天願欲見佛而不差互常值世尊心懷悅豫所聞經典未曾斷絕聽受佛法未嘗中忘如所聞者即能奉行識念菩薩聖衆之慧無所忘失辯才無量未曾空乏菩薩之本所願者得所立之事則有報應常爲諸佛正士之等不見毀訾其佛弟子疾獲神通具諸敏慧護於禁戒能如是者是爲菩薩十法之行不退不轉菩薩大士護斯戒品諸天龍神所共營衛將護歌歎守禁戒者鬼神之衆悉歸奉事龍神悉敬世間人民等而供順諸佛世尊常欲見之諸明智者而俱宗仰愍傷世間而行慈心而爲衆生

化五

十七

護斯禁戒於是菩薩不歸四趣何等四不歸於據無閑之處亦不歸於無佛之土不生邪見歸闍塞家亦不墮歸一切惡趣菩薩若護於戒品者逮獲斯德復有四法無所忘失何等四不忘佛道心不捨佛如所聞法終不中廢不失禪定意念無數無量諸劫菩薩若護於此戒品便逮斯德菩薩復有四法逮得光觀何謂四尋時逮得觀於明法獲致人明毒刀恐懼疾病闍冥之想悉爲辟除具諸功德無能亂者是爲四假使菩薩能護禁戒順斯教者趣度十畏何謂十遠離地獄畜生餓鬼貧匱無稱世界魔畏聲聞緣覺所趣寂滅所受胎生諸天人間及龍鬼神捷沓愁阿須倫真陀羅摩休勒諸所恐難毒刀杖火蛇魃師子虎狼諸難度于邪見能護戒品如是行者

菩薩之法是爲十免越斯難又族姓子戒立佛法以爲光明佛法則立於戒菩薩之道若能奉戒則近定意緣從禁戒得至智慧解脫之行度知見事何謂爲戒皆能永脫一切塵勞何謂塵勞罪福所連三界所著斯則塵勞當以何度此諸塵勞無念無想無思無住而無所行無所興立亦無所惟於一切法而無所求斯則名曰度諸塵勞若族姓子菩薩大士未達塵勞則爲無有清淨戒品所以者何正使往至於梵天者自以欲塵假令上至三十三天亦爲欲塵以是之故族姓子當作斯觀處三界者則爲無有清淨戒品離垢威白佛言設在三界悉塵勞者而世尊云則爲不順清淨戒品云何菩薩離於欲塵逮清淨戒住於三界而不點汙世尊告曰族姓子知乎

譬如有人身生疾病療除所危害非他人也
等無有異如是世尊今日去害近世清淨於
道菩薩因此解脫以是之故觀化衆生及諸
異學猶斯方便救濟衆生惟天中天菩薩大

藏

等集衆德三昧經卷中

化六

西晉三藏法師竺法護譯

爾時世尊復告離垢威力士言族姓子菩薩若聞如此行跡當勤奉行云何求聞稟聽尊長常行恭敬棄捐憍慢言語柔和志性仁調

化六

觀念於法猶如醫藥於師和尚設世尊想自察其身思撰法藥發醫王想於諸衆生爲疾病想若務求法不當愛身不貪命不倚壽不慕於容被服常好經典以法爲本一切所有施而不吝志利法誼放忽財利將護法寶離俗所珍以利法故滅除一切世間財賄以法寶利蠲除凡俗所慕之珍欲除衆生塵勞愛欲一切之瑕常當慕求正法之典欲度一切衆生之類皆至滅度便當持護導以正法以導護正法典者則能普護將養一切所行德

本以是之故假使有人欲求佛道若欲速成最正覺者欲得豎立於法柱者當學博聞譬如族姓子須彌山王爲天大柱若天上柱則爲巍巍多所覆蓋所在嚴飾於忉利天佛言如是菩薩大士博覽廣聞則爲慧柱所可遊居天上世間光光巍巍設族姓子若有菩薩志願佛道我當成佛則當曉了權便博聞常修精進一切衆生在於邪智則爲然設智慧燈明假使菩薩入博聞時精勤求慧則爲具足衆生之智所作已辦爾時諸天則爲其人舉聲咨嗟歡喜善心生焉今此正士如是誼像博聞之力逮十種力致最正覺諸根明達如是利誼爲菩薩行執智慧刀割截一切塵勞之欲若有菩薩如是像誼堪任明慧所說經法則能蠲除衆生塵勞危厄若有菩薩如

是像誼便能說法滅除愛欲如是菩薩則能歸趣往古世尊所可遊居如是誼像則能降伏魔及官屬如是堪任以十二事法輪爲轉如族姓子菩薩大士精勤博聞立於聖達應時即普三千大千世界所有衆魔皆爲憂愁

化六

悵感難可今此菩薩不從我教違吾本心皆見棄捐不得自由所以者何族姓子從聞獲智智於塵勞爲最爲尊其無塵勞魔不得便以是之故當作斯觀假使菩薩開入博聞分別經典好樂於法從是已往所可教授降制衆魔塵欲魔陰蓋魔起滅魔天魔官屬是爲四魔自然爲伏又族姓子猶如往古諸菩薩者所入博聞分別法誼好樂經典今當粗舉略說其要乃云曩昔久遠世時無央數劫不可稱限廣普無量不可思議彼時劫中有一

仙人名曰鬱怛處在林樹得五神通常行等心慈悲喜護遊居幽藪心自念言吾行慈心其身柔軟常悅安隱不可以慈滅除衆生自在愛欲亦不可去瞋恚愚癡曠絕邈路塵勞之欲不以此慈能致賢聖之正見也不可致

福安能逮成賢聖等觀復自念言常以二事可緣致賢聖正見何謂二聽省他音因緣思惟靜志在行尋即歡喜發大精進亦入于法我於何所得聞是說則以法故欲求經典入於郡國縣邑丘聚欲求經卷永不可聞時魔

化六

三

天人往至其所言族姓子吾有佛名將護持頌假族姓子自逼迫身日自暴炙自聞其耳將護音聲然後乃書如是持頌爾乃令仁得聞此頌四句之經於時族姓子鬱怛仙士心自念言我從無數難限劫來棄捐此身樂於

牢獄撾杖鞭撻或以利刀段段解身形體離散肌肉斷絕以愛欲故致得繫縛遭是衆患不可稱數不用此身不用危痛痒未曾以身加益一切假使能已導利羣生吾當以此無堅固身求得經典我獲善利心懷悅豫當從天人逮得聞典志未曾有興世尊心而懷恭恪則取利刀自割其身日中自炙從耳聽聞而謂天言願天演說佛名將護持頌吾恭敬法故放捨身不惜壽命以是因緣等集所聞時族姓子覩見上仙恭恪樂法巍巍如是顏色黧黧憔悴功德難覩即沒不現於是上仙心自念言將無試吾聞此偈乎爲之恭敬奉順法故自捨其身不惜壽命得聞之耶吾所合集恭敬經典所殖德本不失其功不見欺惑假使我身至誠不虛質直無諂愍哀衆生

不貪身命捨其體壽聞此法者由是誠諦於此現世他方佛國奉修法者斯等之人令現面像使我見之得聞經法適立此願口復說言應時下方過三十二諸佛國土有世界名普等離垢彼佛號曰無垢稱王如來至真等正覺今現在說法於時其佛即見上仙心之所念又欲教化閻浮提人譬如勇士屈伸臂頃彼佛如是斯須之頃從已佛土忽然不現即住止于上仙之前及與菩薩五百俱其如來適現世間自然大光普有所照而取天華化六億百千妓樂不鼓自鳴諸菩薩會于彼林藪於時巖樹一切根株莖節枝葉華實皆出法音上勝仙士適聞彼佛見其形像心無所畏即時其體平復如故無有瘡疣於是族姓子上仙見無垢稱王如來至真等正覺相好巍

魏猶須彌山威神光明踰於日月神妙聖達
爲天人尊諸根寂定猶若虛空不增不減歡
喜踊躍善心顯發即從座起更整衣服偏袒
右肩右膝著地叉手白佛是我世尊安住大
聖我歸命佛及法聖衆惟佛世尊爲我說法
若聞經者建立奉行蠲除衆生所貪受行興
于正見而說經典時族姓子彼無垢稱王如
來至真等正覺緣仙士故爲諸天子及諸菩
薩分別說此等集衆德三昧之定於衆會中
八千天子往古造行修治誼理即逮法忍上
勝仙士聞是三昧踊躍歡喜入于微妙尋時
逮得無盡辯才時彼如來說八章句又復攝
取何等爲八一切諸法皆爲本淨從想著致
原自然淨也諸法無漏一切諸漏皆爲盡故
也諸法無著皆度一切諸所著故也諸法不

化六

五

虛亦無有明吾我及人平等一切諸法門故
也諸法何門普現一切諸法門故也諸法無
來亦無往也諸法懷來斷除一切諸所趣故
也諸法平等於三世無去來今故也而無有
二是爲上勝八章句說一切咸度厭諸所有
無有衆患佛告上勝仙士有八門句至無有
二何謂八諸法假號倚名故也諸法像色猶
從名興故也諸法合會依著字故也諸法識
自由恣故也諸法自然則以無明自然故也
諸法爲盡習行愚故也諸法無處立於門者
住無常故也諸法平等以一精進趣於門故
也是爲上勝八句門也本無有二而致於二
佛告上勝復有八精進句至無有盡而得自
在何謂八無者修精進事勸助呪願所修經
典爲現無處彼者行精進句便能示現究竟

法誼不者遵精進句爲除名色爲示現法所
說經法悉令蠲除他者奉于精進現寂然法
本者志于精進講說經法超度一切諸所罣
礙無本者念精進句爲現如來無本之法因
者精進爲現一切緣法罪福爲盡等者精進
三昧示現諸法分別所趣是爲上勝八精進
句無盡辯才佛告上勝復有八法爲妙法句
覺了諸法爲悉平等何謂八空印句而無所
倚而爲現法無相印句無所建立而現經典
無願印句不依不倚不著不求而爲現法本
際印句爲本空句而等御之爲現經典法界
印句等御諸法而爲本現無本印句現入諸
法猶如印句蠲除去來今所本現法滅盡印
句究竟滅盡永除諸法之所本現是爲上勝
八印句也皆悉分別平等諸法而得成就是

化六

六

故於斯上勝自在之句及所門句精進句并
諸印句常當安詳順行其而精進學如是族
姓子於彼無垢稱王分別所問於此遣智至
彼世界及餘菩薩五千億百千姪菩薩斯須
之間如發意頃自還佛土雖還本土無去無
來其土人民不見如來爲去爲來於是族姓
子上勝仙士獲無盡辯意不疑妄亦無所失
得爲諸天之所救護降伏衆魔及外異道行
入郡國縣邑州城大邦爲一切人講說經法
分別演斯等集衆德三昧具足千歲宣現此
典開化八萬四千羣萌之類住於聲聞發起
八萬四千衆生志於緣覺八萬四千黎庶皆
發無上正真道意勸助八萬四千烝民後悉
當爲轉輪聖王八萬四千建立帝釋梵天慈
悲喜護無央數人得生天上上勝仙士至于

末後仙沒之時生於無垢稱王如來至真正覺之土在於晉等無垢世界與萬四天子俱佛言族姓子欲知爾時上勝仙士爲異人乎勿造斯觀所以者何則吾是也吾以志誠建立正願即致下方所在世界無垢稱王如

化六

七

來至真正覺以是之故族姓子當作是觀於樂法菩薩如來未曾取於滅度正法之教亦無滅盡其好樂法爲菩薩者他方世界諸佛世尊則現目前樂法菩薩若在巖處若在樹下獨閑居者若中間坐即時得現授總持門置于手掌若現滅上若在頭上若在頂上近而不遠樂法菩薩已爲曾見過去諸佛又諸天人發其辯才亦復從受辯才之慧樂法菩薩於此經典無有窮盡諸佛世尊及諸天人不奪其願道所建立猶得自在欲得住立百

歲千歲一劫過劫亦得由已樂法菩薩除老病死興發其心其意所在堅強久固御於大智辯才之慧樂法菩薩未曾發意犯於他人以是之故離垢威聞斯博聞所積行者遵奉精進便當逮獲於此名德當復過是復倍無數若有菩薩欲得獲致福藏德普慶無終訖祿無窮已菩薩所享功祚無量不可稱限無能盡極其邊際者離垢威如其大海水尚可數滴測知限量得其底涯菩薩所興三事戒聞施惠不可勝限得其邊際三千大千世界尚可稱量知其銖兩盡其邊際欲盡菩薩所興三事戒聞施道不可限量是爲族姓子三事行品三事之中博聞爲尊爲勝爲長爲無儔匹譬如須彌山王持戒施惠猶如芥子在須彌山側當觀博聞則須彌山王也譬如飛

鳥翔翔虛空是影所翳寧幾如乎持戒施惠猶如斯也譬如虛空弘普無際博聞之德其若茲矣所以者何族姓子施有二益離貧匱得大富戒有二益度惡趣生昇天聞有二益得聖慧除邪疑其布施者不離諸漏所受之

化六

陰其持戒者所受諸陰亦與漏俱其博聞者無有諸漏亦不受陰以是之故離垢威斯謂菩薩博聞之應佛說施戒博聞之時三萬二千羣生殖衆德本皆發無上正真道意五百比丘漏盡意解得法眼淨於是離垢威力士白佛言菩薩幾法行疾得不起法忍佛言族姓子菩薩有四行法疾得不起法忍何謂四一觀身如影而得解脫二入於諸法如呼聲響三曉了其心猶如幻化四察一切法皆歸滅盡是爲四菩薩疾得不起法忍復有四法

何謂四普修弘慈加諸衆生設使學者起於人想勸使曉解一切諸法令知盡無不造有事普皆觀見諸佛之法不以肉眼亦非天眼亦非法眼無所依倚分別曉了心之所入亦無有心亦不見心亦無緣會是爲四復有四何謂四一切所有施而不吝棄捐邪見奉清淨禁寂除塵勞是爲四復有四何謂四遵忍辱力入于諸法悉知盡索而崇精進好憺怕法是爲四復有四何謂四逮得禪定則無所倚察於智慧亦不輕虧攝權方便不著衆生皆具所行入無等倫是爲四復有四何謂四常行大慈導利衆生具足大悲不厭終始行于大喜欣樂於法行于大護除諸倚著是爲四復有四何謂四證明部分於三脫門除諸三世過去來今超度三界觀一切法本淨無

化六

九

穢佛言離垢威是爲四法行菩薩大士疾得
不起法忍佛說此時離垢威菩薩逮得不起
法忍歡喜踊躍昇處虛空去地四丈九尺三
千大千世界六返震動其大光明普照世界
而雨天華百千妓樂不鼓自鳴於時世尊知
離垢威菩薩所念尋時欣笑五色光從口出
照於十方無數佛國還遶三帀從頂上入賢
者阿難即從座起更整衣服偏袒右肩右膝
著地叉手白佛以偈讚曰

德尊淨智慧 其目清明好 諸根爲寂定
憺怕度無極 光明照七尺 金容神巍巍
何故現欣笑 惟願爲分別 知諸天人行
心意所歸趣 三世之清淨 觀之所像類
其慧常通達 未曾有罣礙 何故現欣笑
月姿哀爲說 過世天中天 將來之世尊

今現十方佛 智慧暢無量 修行悉清白
療愈若干病 一切靡不了 言爲分別說
其身普周徧 於此諸佛國 言音悉暢達
無數之刹土 心向一切人 常垂弘大慈
最勝哀爲說 敷演斯笑意 所在究練法
寂然如月遊 無喻如幻化 自然若如夢
所獲致得利 常如雨泡起 何故現欣笑
無師子師子 解空無有相 超度願脫門
諸法爲自然 了現究竟誼 寂默常調定
遊步如虛空 願佛分別意 今笑何感療
孰爲發妙心^{化六} 志願尊覺慧^十 誰令力降魔
應坐樹王下 最勝今日誰 而爲超擁護
何故現欣笑 大雄發遣之 諸聲聞之衆
不能躡斯地 一切之緣覺 莫敢逮此道
是諸佛境界 其德如大海 何感而欣笑

世勝哀說之

佛告阿難爾爲寧見離垢威踊在虛空去地四丈九尺乎對曰已見天中天佛言離垢威力士菩薩過三百不可計會劫當逮得無上正真爲最正覺號力嚴淨王如來至真等正覺明行成爲善逝世間解無上士道法御天人師爲佛衆祐在于東方世界名清淨劫名淨歎力嚴淨王如來清淨世界富樂熾盛人民安隱百穀平賤快樂難及諸天人播殖無數彼國人民被服飲食居上舍宅譬如第四兜率天上其佛說法無有奇特異種之說惟但宣暢菩薩藏其佛國土無有聲聞緣覺之名皆純菩薩逮得法忍諸菩薩衆甚多無極其佛壽命無有限量其土無有八愾之難降伏衆魔抑制怨敵無有羣邪諸外異道其

化六

十一

佛世界地紺瑤璃紫磨黃金分錯其間於是離垢威菩薩從虛空下稽首佛足歸命世尊從佛請求欲得出家爾時鉤鎖菩薩前白佛言惟天中天怪未曾有如今大聖講說經典其有諸天在於虛空名德高妙皆詣如來適見如來尋時歡喜棄捐貢高自大之念稽首世尊投身自歸大聖乃能開化於此離垢威力士憍高自大來詣佛所逮得大法當爲無量不可思議衆生之類演說經法令除慢恣唯然世尊其離垢威菩薩大士爲從幾佛如來至真等正覺殖衆德本乃能疾逮如是神通世尊告曰鉤鎖欲知其離垢威力士菩薩已曾得供養六十二億諸佛大聖殖衆德本建立無上正真之道當復奉事無數諸佛淨修梵行鉤鎖又問唯然世尊以何所殖元德

之本而忘道意心懷憍慢自大之性來詣世尊欲有所試佛告鈎鎖有四事法爲菩薩行而忘道意何謂四心懷憍慢不恭敬法輕易善師從後謗議是爲四復有四法何謂四而復習樂聲聞之衆與同所歸志樂下度誹謗菩薩忘法師恩是爲四復有四何謂四其行諛諂於法謾誕二事自活求於利養而著奉侍是爲四復有四何謂四不覺魔事爲罪所蓋纏綿蔽法志性怯弱鈎鎖是爲四法菩薩忘失道意鈎鎖又聽離垢威用何等故爲菩薩行而忘道意往古世時此賢劫中初始有佛號曰拘婁秦如來至真等正覺興出于世於彼世時有善財大勢貴姓極富梵志時有一子魔所惑立身發貢高不欲往詣於如來所長益法與沙門梵志諸長者俱鬪諍罵詈

化六

十二

多所誹謗不肯受法亦不見法不得法師亦不恭敬承順其教當爾現世違失五法何謂五則離於佛不復相見不得聞法不復建立菩薩之業不復咨問所當行者而復忘失衆德之本無堅固意在於道心攝取不善尋時則離於道行心爾時尋離此五法行佛言鈎鎖欲知是時所名善財大勢貴姓梵志子乎豈是異人勿作斯觀所以者何則今離垢威菩薩是也於彼世時心懷自大尋則忘失所修道意又復將護宿命德本諸通慧心又有餘福不復誹謗於諸通慧故爲力士而有大力勢承佛聖旨不爲衆惡聞佛音聲便自發來自以已力欲比如來又聞世尊說菩薩力尋即棄捐貢高慢恣往古所殖衆善之本則現目前便逮法忍威神通慧無所想念爾時力

士鈎鎖菩薩謂離垢威唯族姓子與發何法逮得法忍離垢威答曰發起一切凡夫之法又問云何而發答曰所發起者至後究竟永無所有亦非不異其所發起常不復令有所依倚亦無所證鈎鎖又問族姓子凡夫之法化六及與佛法有何差別寧有若干乎即復答曰假號而名因有若干其義無異又問唯族姓子其凡夫法以何解義答曰無常亦無想念無顛倒義又問族姓子所謂義者何所歸趣答曰鈎鎖其達義者亦不蠲除凡夫之法亦不獲於佛道法又問族姓子何謂法義答曰無有二義爲諸法義又問不自其正見者有二因緣從他聞若思惟厥行猶具又問鈎鎖如來不說但歸要誼之故誼則成要因此何緣要得誼乎不取美辭又問鈎鎖答曰教不

但取正誼終不毀壞爲菩薩美辭乎則無有失自損毀也假使有得美辭誼者彼所逮者亦無所獲其菩薩者歸於要誼而說法誼以聰哲故其不逮得不用誼報一切諸法猶得自在爲尊爲長爲無等倫所可分別限時消滅究竟滅度本末永寂則爲相誼世尊所說以故鈎鎖其歸命誼則不御法亦無所念亦無御者不捨不御其無所念則爲堅要其堅要者彼乃謂誼鈎鎖又問惟族姓子豈有方計其歸要誼彼則歸要一切法乎答曰有族姓子又問以何因緣答曰諸法無本一切悉空諸法憺怕假使歸要於空誼者要憺怕誼亦復如斯以是之故族姓子其歸要誼則爲導歸一切諸法答曰族姓子佛不言曰了一切諸法悉歸要耶答曰如斯以是之故一切

諸法推究本誼根原所歸要者其究竟誼是等之門則第一誼如云當求所如所也求如是行者設無有法亦非無法亦無所起亦無所滅諸賢聖道無有二道亦無所作亦非不作亦非無造如是則造菩薩之道道無所造

化六

十四

亦不求誼亦儀不錯亂離垢威說是語時五百比丘八百天子遠離塵垢得法眼淨離垢威菩薩謂鉤鎖曰族姓子如來所說但歸要誼不取美辭計此誼者無有二行究竟其誼亦無所生是故如來說此誼耳但歸要誼不取美辭其歸要誼并及美辭本淨平等志性自然無所超越如來故曰但歸要誼不取美辭復次族姓子如來所以說此言者何以二事故興於正見何等爲二聽察他音緣省思惟其不博聞於法律者順以三昧在於終始

墮于貢高類斯之故世尊告曰聽省法律乃爲博聞多所勸助以聽經法悉以奉行淨於所療至賢聖道又問云何比丘思惟療行答曰以法療行亦無所行是爲思惟要事有療行族姓子是爲療行之所謂者復次族姓子假使菩薩療行不發音聲不起吾我有所講說諸行處者若說去者若說還者一切皆亦無往亦無所得亦無過去亦無當來亦不現在修此諸事是謂思惟要者而以療行設見諸法一切自然悉歸滅盡設受諸法思觀要淨假令察見一切諸法本淨同像亦觀要淨設見一切諸法諸法自然從本淨起亦觀要淨設使觀見一切諸法本末不生究竟無起究竟無滅亦觀要淨設使觀見一切諸法本淨滅度亦觀要淨亦不寂然亦無所觀是謂

化六

十五

爲觀是所觀者亦無所觀亦無所見假使無見無所觀者所見如是亦不見則不名曰有所見也於是世尊讚離垢威菩薩曰善哉善哉族姓子有所說者當如仁說其思要淨爲菩薩者法不虛妄其思要淨爲菩薩者法無陰蓋其思要淨爲菩薩者無有此法亦無脫門其思要淨爲菩薩者所行法者亦無所除亦無所行亦無去來是則等觀爲正見也見一切法以平等故亦不等如有所見又問云何一切諸法而不等如有所見如無所見又族姓子此諸法者亦無欣見亦無不見本末平等亦無所生此之謂也亦無所生亦無所有不越所見不入寂然此謂平等亦不不有亦無所有亦非自然非不自然是謂平等是所言者亦無所說行無所生亦無有見亦

無越度平等寂然斯謂等觀以能入于平等故也又復重問何故名曰平等入寂然乎答曰等於吾我亦等非我一切諸法亦無形像亦無毀譽是謂平等入于寂然於是鉤鎖菩薩白佛言唯然世尊至未曾有正入寂然所由相者本淨滅度菩薩皆知如是諸法若復聞者乃能信解有所遊居亦不中半而取滅度佛告鉤鎖何以故菩薩善權方便而以爲樂以權方便修具足行發一切心歸於遊處四法何等四行大慈無極哀爲諸通慧不斷化大佛教是爲四假使能奉宣備此法則入寂然所趣之相一切本淨悉爲滅度以至寂寞諸法之行適聞此已則便信樂所可遊居亦不中半而取滅度是故分別諸法之原彼則寂寞亦無擔怕亦不墮落所以者何不欲棄捨

一切衆生離垢威菩薩白佛言何所菩薩純
淑如佛所言不墮寂滅世尊告曰族姓子假
使菩薩無有諸見亦無想念是爲純淑於諸
聲聞一切衆生不修平等離佛法教亦不勸
樂大乘之行疑諸通慧離於無願亦不滅度
入於寂滅則於其中證菩薩心志在聲聞緣
覺而入滅度又族姓子菩薩若能入於寂然
相者皆能分別一切諸法有所興發悉爲一
切順佛法衆遵修大乘爲諸通慧之所興居
愍傷一切羣萌之類普見一切與志願俱未
曾斷絕他人所僥以是之故族姓子當作斯
觀計於菩薩而皆純淑遊于寂然離垢威白
佛言未曾有世尊菩薩所行而有差特悉非
聲聞緣覺之地所能及也於是鉤鎖菩薩白
佛言今此溥首童眞者在此會中靜然而坐

化六

十七

亦不講說於此三昧世尊尋見文殊師利心
之所念以心靜觀溥首童眞溥首童眞謂鉤
鎖菩薩菩薩所行不以功德遵修佛道不以
利養不以生天不以財業不以名聞嗟歎德
稱宣揚其績不以衣食床卧病瘦醫藥治生
之業不以國王大臣賞賜故鉤鎖又問溥首
菩薩以何等故行菩薩道溥首答曰爲衆生
故如愍傷之故以法之誼開化羣黎志大乘
故除於虛妄諸勤勞患生寂然故已忍勞苦
欲安衆生令得所願無所狐疑無希望故則
無所著亦無所倚亦無所受亦不專處亦不
究竟無有善哉亦不吾我無有斯念亦不退
轉亦不還返設使諸法無所動轉亦不肅震
無有將往無所危害無有歡喜亦不愁感已
獨勇猛無能勝者無能伏者莫能踰者亦不

等集衆德三昧經卷下

化七

西晉三藏法師竺法護譯

復次鉤鎖菩薩所遵不行色空色者自空亦
不空痛痒思想生死識行識自然空亦不教
人行色爲空色者則空本末盡無則曰自然
痛痒思想生死識則亦爲空若欲盡者本末
盡空故曰識空亦曰自然若已盡者一切諸
法亦當復盡若諸法盡色亦當盡痛痒思想
生死識識已便盡假使一切諸色盡者一切
諸法亦當復盡設諸法盡者識亦當盡假使
菩薩遵修如是爲菩薩行則應道行復次鉤
鎖菩薩菩薩所行亦不斷除凡夫法行至於
佛法亦不慙慙度生死行也亦不具足於滅
度事亦不覩見不善法興亦不觀察於諸善
法之所由來不以慧故亦不見識不用識故

而見於慧亦不破壞諸法界行有所信喜至
於解脫也假使菩薩遵修如是爲菩薩行則
應道行復次族姓子菩薩大士若造行者法
界無量人界無限而悉信解法界無限慧界
人界悉盡所行法界人界則無有二不以法
界而有所損亦無有盡相亦如是人界亦然
人界有相法界無相及與人界如此相者則
無有相其無有相觀一切法悉無有相不盡
人界行無所長益從無要思想而興起發也
顛倒之事誑詐化惑相處其中其所行者不
除欲塵不慕所生亦不名聞亦不計常亦無
所壞亦不滅除我人壽命假使菩薩遵修如
是爲菩薩行則應道行說是菩薩所行者品
時百千天子逮得法忍爾時離垢威菩薩即
尋啓受舉大音聲而歎頌言使一切人羣萌

之類所願皆得普獲利誼如佛世尊悉令信樂此三昧定爾時魔王波旬謂溥首童真曰我爲堪任歎菩薩道如菩薩行乎溥首答曰可行也時魔言曰一切人行則菩薩行諸聲聞緣覺行則菩薩行下一切居家所習陰擔化七之行則菩薩行一切魔行則菩薩行所以者何菩薩皆當同處其中一切悉學是菩薩學鉤鎖菩薩往詣魔所而謂之曰云何菩薩而悉普學魔答曰八萬四千種衆生之行二萬一千則屬貪欲行二萬一千屬瞋怒行二萬一千屬愚癡行二萬一千屬等分行是等之類皆悉徧入菩薩之行是故鉤鎖行貪欲行而離於欲行瞋怒行而離於怒行愚癡行而離於癡行等分行而離等分適無所著又族姓子若有菩薩普遵一切衆生之行則能徧

察羣萌之行開化一切黎庶之類若有菩薩所修如是爲菩薩行則應道行又問魔曰何謂一切魔行爲菩薩行答曰菩薩皆當入諸魔心之所行故也不以起爲起不隨魔事之所教也覺了魔行化衆生行觀其所行不循彼行獨於魔衆而示現不行魔行又當修覺魔之治化雖在魔中而無魔事又問魔曰何謂一切聲聞緣覺行爲菩薩行答曰族姓子假使菩薩爲諸聲聞緣覺講說經法具足所願在於彼行遵崇長益精進之行當求斯慧化七不用彼乘而取滅度也復次族姓子一切諸行皆自然行爲憺怕行菩薩所當信樂行者其行已過一切所行如審諦行一切諸行無所住行一切諸行悉無爲行亦無合會無所起行無所住行菩薩當崇如是之行魔王又

問溥首仁可垂恩重複說此諸所行乎溥首
答曰辯才堪任皆度一切所有境界爲菩薩
行所以者何其彼行者不與眼界而俱合也
不與色界而合會也不與耳聲鼻舌味身
更意法意界而俱合也以是故魔當作斯觀
假使能度諸境界者號曰正士復次天子菩
薩設能如是行者不爲欺惑諸佛世尊如是
行爲菩薩行則應道行又問何謂溥首菩薩
所行而不欺惑諸佛世尊及一切法溥首答
曰如來所說誠諦解諸法空一切悉無逮最
正覺假使菩薩依倚見身及諸佛法并見泥
洹則爲欺惑諸如來也天子欲知如來行者
於一切法而無想著乃逮正覺假使菩薩於
一切法有所想求與想遊居則爲欺惑於如
來也天子如來審實誠諦無所從出亦無所

生亦無所起亦無所有亦無所倚亦無有相
來無所來亦無所住本性清淨本性明達本
淨滅度猶如虛空無有形貌解一切法亦悉
如是乃逮正覺假使菩薩在於諸法有往有
來有出有入若有所起忽然現者出於所有
依因於相若有往返若有所立無有清淨若
有塵勞終始周旋獲色所有而爲放逸有所
思念即爲欺惑如來假使天子若有菩薩等
御解空了一切法皆於諸見而無思想等御
所行解一切法悉除諸想等御無願分別諸
法度於三界等御如空解一切法不著本淨
遵修如是爲菩薩者不爲欺惑諸佛世尊於
時大聖讚溥首曰善哉善哉童真如是行者
爲菩薩行若有菩薩所行如是疾得受決佛
言溥首吾憶往昔錠光佛時已身勸助行清

白法所行無行亦不寂滅得受決也所以者何度一切行名曰所現光適觀斯已何爲想行時有色莫若而志利義適從錠光如來大聖受決則了本淨即時普解一切諸法悉無所起然後錠光如來所見授決仁於來世當得作佛號曰能仁如來至真等正覺明行成爲善逝世間解無上士道法御天人師爲佛衆祐於彼世時尋逮得起法忍以是之故溥首若有菩薩欲疾逮得起法忍當修此行救諸退轉心無所著不以利業精進行法無所脫度無所度無所度乃得解脫溥首又問佛言唯然世尊得法忍時爲何所逮世尊告曰不得於色乃逮法忍痛痒思想生死識亦無所得乃逮法忍不得陰種諸入乃逮法忍不得計常空淨安隱及與我身乃逮法忍

化七

五

又復求覩不得一切諸法乃逮法忍佛言溥首諸法悉盡故曰爲無所得溥首法忍無逮亦無所得隨習俗行故名曰得非凡夫法亦非學法非不學法非緣覺法非菩薩法亦非佛法有所行也於一切法都無所行故名曰盡逮得法忍一切諸法亦不可得是故曰盡逮得法忍假使法忍空無所有於一切想諸所行者而無所畏故曰盡索逮得法忍彼無有眼亦無眼識無有耳亦無耳識無有鼻亦無鼻識無有舌亦無舌識無有身亦無身識無有意亦無意識諸界無盡則曰法忍無爲界則謂法忍無有意界乃謂法忍皆悉盡索乃得法忍說是法忍諸法盡索時五百菩薩得不起法忍同音舉聲白佛言唯然世尊我等當具等集衆德三昧亦當普備於一切法

逮無所起是深妙法諸菩薩學所當承順若有聞者當歡喜信受持誦如法奉行於是鉤鎖菩薩謂溥首曰有所言曰所作已辦衆事成就菩薩當以幾法所作衆事究竟成辦溥首答曰族姓子若有菩薩知一切法而無所作如是菩薩所作已辦究竟成就一切諸法悉無所有亦無所行曉了諸法能如斯者所作已辦究竟成就亦不有智亦無有二所作已辦究竟成就亦不離作亦非不作亦無不作所作已辦究竟成就有所者有宣揚所作已辦究竟成就若得恩者報所得恩所作已辦究竟成就遭無返復加以返復所作已辦究竟成就當供養者爲之謙卑自屈施禮所作已辦究竟成就知返復者若離返復若能辦事離不辦事所作已辦究竟成就若輕

化七

六

易者而見忽捐稽首爲禮所作已辦究竟成就有所作者不得所作法之所行有所遭觀不得所過所作已辦究竟成就若布施者勸使入道所作已辦究竟成就亦不得施亦不得道亦不得我亦不得人亦不得他所作已辦究竟成就不護禁戒忍辱精進一心智慧亦無所護勸使趣道所作已辦究竟成就若有施與持戒忍辱精進一智慧勸使入道所作已辦究竟成就非智非愚無我無他亦無所得所作已辦究竟成就身行口言意念奉行衆善分別此事若身口意所行衆善亦無所得亦無所著是則名曰所作已辦究竟成就爾時常堅精進菩薩謂溥首曰我爲應任說菩薩所作已辦究竟成就乎溥首答曰堪任族姓子白溥首曰若勸一人令聞道音

所作已辦菩薩篋藏應時自恣若令得佛音
法音聖衆之音則當察之所作已辦若化一
人使受戒禁使歸命佛及法聖衆志在三寶
所作已辦具足菩薩篋藏若供養若所遊居
若有施者若有受者勸助志道此二事者則
是菩薩清淨衆祐若有施者及有受者以斯
法行而勸化之此二事者悉是菩薩清淨衆
祐假使菩薩思惟念佛若復思念經法聖衆
菩薩衆生所作已辦菩薩篋藏而受供養假
使菩薩修行慈心悲喜護心若值一人下劣
貧賤盜賊屠膾罵詈衝口而能忍之不以瞋
怒續行慈心歡悅之意以待其人欲益利誼
益加精進所作已辦若獲百利若千利若百
千利億百千利若以珍寶滿閻浮提得斯利
者未曾以寶而發兩舌又復諮啓問他人慧

寧失身命不從其後而說惡也不忘於法不
承非法觀此菩薩所作已具究竟成就復次
溥首假使菩薩七日斷供而不得食若復有
人授飲食者其人則近諸通慧心不爲虛妄
又欲度脫一切衆生欲念救濟羣萌之類觀
此菩薩所作究竟假使天下普徧滿水周市
其地當越度此行求聽法若徧滿火亦當越
度行求聞法亦不惜身亦不貪命亦不受壽
而造斯觀陰種諸入易易得耳諸佛世尊難
得值遇經法難聞恭恪於法亦復難遭若入
此數觀斯菩薩究竟成就復次菩薩若聞四
句之頌歡喜踊躍不願享祚爲轉輪聖王寧
以四句頌令人得聞熙怡豫悅不樂帝釋位
寧立衆施誘化狗犬禽獸龍神不生梵天欣
樂諸通慧心不貪三千世界之七寶喜踊願

志殖一德本不僥一切衆生供養之利菩薩
所行修如斯者當觀菩薩成就究竟常堅精
進菩薩復謂溥首有菩薩常堅精進常求博
聞心當念此假使有人節節段段解其身者
當發歡悅以自勸勉是皆俗法之所致也專

北七

志修行念於佛道寧失軀命終不犯戒不捨
大乘不爲愚心不興邪力致忍辱力口言不
麤悉能堪任終不懈怠修精勤行嚴淨佛土
而救衆生不爲非法普求一切諸度無極不
求伴黨不望衆生堅住智慧不斷佛教志性
強猛一切所作無不成辦其意仁和棄捐諛
諂無所貪慕不惜身命曉練便宜不久立者
令得自歸奉戒清涼先人問訊語言柔輒辭
不綺飾譬若如地離於所求而無所求無所
結倚性行純善所答安隱所說常快敬受善

諫棄除貢高常遜卑意所言至誠無有忿訟
所說如實無有詭譎言行相應遵尚等心愍
於衆生常有慈心向諸羣萌志於大哀爲黎
庶故無有瑕疵建立一切衆德之本而懷欣
豫一切所有施而不惜當以行護救濟所欲
及得財業當行安隱放捨一切諸所貪愛無
有我所不倚所有終不自大蠲除三垢志求
解脫離於想念所思所著不墮諸見無六十
二當行博聞具足七財心常強勇所聞曉解
未曾有厭當學智慧有所建立住於勇猛降
伏塵勞離於欲垢療治一切衆生之病常爲
衆祐未曾捨離諸通慧心成就福田令諸衆
生悉得蒙恩行如蓮華於諸世俗而無所著
猶如船師度諸羣生四病之患志如王路不
懷輕慢貴賤中間之人當如泉源川流江河

北七

九

所說經典而不可盡行如大海所聞智慧包
無崖底無量之德之所積聚性如須彌超現
于世峻極而高常樂精進志性慷慨心不怯
劣心如門闥志願堅固意如鶴毛調和其性
當行專心濟導衆生修於自在勸助其意志
存奇雅微妙解脫行如天帝懷來衆生尊如
梵天分別權宜清淨之行於一切法而得自
在常當行慈究竟滅度行如終沒若有觸犯
作與不作悉能忍辱心如嚴父所受至重志
如伴黨於諸德本而無所著意無所倚於諸
境界行無危害而修慈仁所在吉祥於所生
也爲布施土謂法施也斷除一切諸不善法
奉行一切衆善之法遵無放逸除於自恣憍
慢之事學戒精進所行堅強爲無放逸修菩
薩行乃能致得無上正真之道爲最正覺於

時世尊讚常堅精進菩薩曰善哉善哉族姓
子說菩薩行快乃如是建立衆德若有菩薩
設欲逮得等集衆德三昧普當分別一切功
德離諸罪疊爾時鉤鎖菩薩前白佛言若有
菩薩逮得於是等集衆德三昧功德瑞應比
類若何佛言鉤鎖今此等集衆德三昧菩薩
大士獲此定者則能遠離惡趣之地無有八
懷厄難之處除斷窮窶供饒豐沃自然富樂
諸根具足便能成就三十二大士之相法無
窮盡逮得辨才獲于總持常不失意於一切
福德自在成轉輪王無所倚礙爲諸羣黎之
所奉事爲天帝釋所見咨嗟梵天稽首而爲
作禮逮獲神通靡不明達得其本願自在所
生行權方便進退智慧不隨禪教遵修智慧
離一切見極尊特貴聲聞緣覺所不能及離

諸恐畏聲聞緣覺智慧分別諸根曉了衆生
本末娛樂諸見志于一心脫門之事住無處
所常順所施建立于戒護三清淨分別忍辱
竟無有形離諂偽想講說精進志無懈倦解
說禪定常度寂然敷演智慧目常覩見而悉
分別目無所著而常棄捐除於六徑未曾違
遠常見諸佛好樂聽法奉事聖衆慇懃修行
不離於空無相無願所聞經典歌頌一切諸
佛功德悉受佛誨即以誥受善爲衆生分別
說之在堯率天未曾捨離不退轉法若欲遊
行一切佛土無有罣礙普見諸佛降伏魔怨
無有四魔見深法忍處不退轉法速明神通
在於道業法靡不博懷來寂然清白覩見所
行具足佛法現不退轉行之所趣除一切著
所可罣礙見吾我色猶如幻現觀察悉見一

化七

切身復無能勝者謂諸異道受護正法諸佛
尊典不惜身命其行慇懃將御正誼現佛境
界常無永絕雖已泥洹而不滅度得無所畏
遊在衆會而無恐難聰明獻達隨其所作而
善蠲除去於一切貢高自大修大莊嚴如幻
三昧有所感動若放光明而悉覆蔽日月星
明摩尼火電得堅強力身如鉤鎖行如金剛
皆度一切諸惡所趣普詣道場淨遊無量諸
佛國土普聞其聲佛所建立身口意淨降伏
魔兵神足變化度於無極震動一切諸佛國
土得聰明慧分別法誼之所歸趣辯才具足
慧無罣礙爲諸衆生遵行精進興顯佛事而
無放逸於諸通慧現佛境界如是鉤鎖若有
菩薩逮得於斯等集衆德三昧是諸菩薩瑞
應因緣儀像衆德名聞之事巍巍如是鉤鎖

白佛皆令一切衆生之類俱共逮此等集衆
德三昧所以者何唯然世尊若有逮得於此
定者衆德名聞堂堂乃爾聲聞緣覺所不能
及假使有人聞此三昧而不信者則當知爲
魔所燒固佛言如是如是鉤鎖誠如所云設
使有人信是三昧名德之勲不可思議爲佛
所護於是鉤鎖又問溥首曰若有菩薩意欲
逮得等集衆德三昧當行何法溥首答曰若
有菩薩意欲逮得等集衆德三昧未曾毀壞
凡夫之法當修斯行所造行者於佛道法亦
無所得若欲行者當作此行無法無見亦無
所憂復次鉤鎖若有菩薩欲得斯定誓歎終
始不爲生死之所點汙得於無爲不於聲聞
緣覺之乘而取滅度也復次鉤鎖菩薩欲得
斯定意者具足衆德當學所學之禁戒也亦

化七

十二

不想念有漏之福無漏之德無罪不罪不有
不無不著不捨不去不來世不度世未曾懷
念如此諸想等御法界信樂衆德有福無福
有常無常有念無念不入終始所著之想爲
一切人遊入衆德不爲一人處遊福祐以一
人德普入衆生之所有福若漏無漏不復分
別不以此教一切佛德則一佛德當作斯念
所可教化說諸佛法無有差特當信知此其
所學福無所學福若緣覺福若菩薩福若如
來福此則無常亦無形貌色像也當喜信樂
一切諸德福之所湊譬如鉤鎖諸有形色皆
有四大亦復如是諸菩薩法皆度衆生至于
脫門奉行等福當所爲者所興盛者無常盡
法復次鉤鎖若有菩薩欲得此定意於四無
量不懷恐懼何等四人界無量佛土無限佛

慧無邊衆生之行無有底是爲四復次鉤鎖若有菩薩欲得此定常當勸助四不可思議何等四罪福報應不可思議衆生之行不可思議而所趣路無有差特諸菩薩慧不可思議神足力勢脫門諸菩薩之所歸趣不可思

化七

十三

議所生清淨是爲四是故鉤鎖若有菩薩於此三昧見無盡當行四法何等四於斯建立菩薩之福住不可盡具足衆行亦不可盡無礙辯才亦不可盡智慧所達亦不可盡是爲四復有四事何等四勤精於法積衆德本而無厭極當念勤行入聞無厭而說經典當念勤行勸助無邊衆善之德觀諸佛土所有莊嚴以入已土而成清淨是爲四鉤鎖菩薩謂溥首譬如瑠璃明珠寶所著器中若在金器銀器水精器碑礫器則以瑠璃明珠寶器

威德之故不失自然如是溥首若有菩薩住是三昧若在居家若復出家住沙門計於法界自然之行無三脫門又溥首菩薩何行有所遵修不失三昧有所逮得德慧無盡溥首答曰鉤鎖欲知菩薩當行四事何謂四不惜身壽命不求一切供養之利行空無相無願不志聲聞緣覺之乘欲得佛慧思惟其行於諸通慧放捨所思所想可應不應一切衆生等入行度我人壽命亦不可得是爲四鉤鎖又問溥首此三昧者然後歸趣何所菩薩若取經卷著在身懷若興忍辱設使居家若出家學因緣學行乎溥首答鉤鎖曰後若得此三昧者假使有人逮聞其名則非居家出家因緣所以者何是故鉤鎖若有菩薩住三昧則離二想所在遊行其壽智慧不可盡

極無所亡失開化衆生不以爲厭不自示現
菩薩形類又在所湊一切無邊亦無因緣譬
如鉤鎖日月所遊一切無邊菩薩如是觀無
倚行若在家地隨家依倚亦不出家爲出家
行亦復不著出家之德於斯二事亦無所慕
所以者何菩薩所出悉無所著譬如鉤鎖無
所得者乃成正覺於此菩薩有四事行何等
四爲尊爲上而爲最勝棄除一切諸所見事
及入一切諸佛之法是爲四鉤鎖又問溥首
云何菩薩處於遊居溥首答曰菩薩有四事
行何等四慈悲喜護是爲四其有奉行是四
梵行吾乃謂斯爲遊居復有四何等四若復
遊處聚落舍宅則處遊居假使復在於閑居
行若在棚閣重室作行則亦處於遊居是爲
四溥首復謂鉤鎖曰其不奉修此四梵行而

化七

十四

自念言我處遊居其人則爲欺諸天人所以
者何諸佛世尊說四梵行乃謂遊居其四梵
行則處其頂是清淨行而處遊居在於國土
受分衛食威神在頂是故鉤鎖其有不見四
梵行者則爲遠離四等心行若復有修梵淨
行者皆悉因從四梵行起得賢聖慧不爲世
間自現身也貢高自大不除人想鉤鎖又問
溥首云何菩薩奉慈心行何謂悲何謂喜何
謂護溥首答曰則以幻事救護一切衆生之
類則爲行慈而以幻事度脫衆生則爲行悲
若以幻事安隱羣萌則爲行喜說以幻事令
諸黎庶逮得滅度則爲行護復次鉤鎖信解
衆生界空則爲行慈信解法界衆生之界無
作非不作則爲行悲信解了知諸羣萌界無
著無脫則爲行喜信解了知黎庶之界求無

化七

十五

所求則爲行護復次鉤鎖一切衆生無有吾
我亦不恐怖則爲行慈一切衆生悉爲憺怕
亦不畏懼則爲行悲一切諸法法界平等亦
不懷懼則爲行喜信解分別一切佛土無盡
之國則爲行護復次鉤鎖無危害相則謂爲
慈無等倫相則謂爲悲無有二相則謂爲喜
無有名無所著相則謂爲護復次鉤鎖無所
住慈不爲大慈無所住悲不爲大悲彼何謂
不爲大慈猶如聲聞發是念言令諸衆生皆
獲安隱是聲聞慈不爲大慈何謂大慈假使
等心於羣萌類而皆度脫衆惱之患是謂大
慈彼何謂悲不爲大悲黎庶之類生在五趣
愍傷哀之於生死中而欲拔濟是謂爲悲不
爲大悲何謂大悲見於五趣生死拯濟所生
之處而行愍哀自捨身安救護五趣便能濟

拔衆生之界尋時建立於平等道是謂大悲
是故鉤鎖當作斯觀聲聞有慈不爲大慈亦
復有悲不爲大悲是故鉤鎖若有菩薩當具
足行大慈大悲溥首說是語時八千人皆
發無上正真道意俱共歎言唯然世尊我等
亦當奉修此行如今向者溥首所說百千天
人逮得是三昧八千菩薩得不起法忍於是
鉤鎖菩薩白佛言如來願說百福之相作何
功德而佛世尊成斯相乎時佛告曰譬如鉤
鎖江河沙等諸佛世界悉共合集滿中衆生
功德具足爲轉輪王比七一身之德是諸衆生所
有功德皆如轉輪聖王悉共同合爲天帝釋
一身之福復有別異江河沙等諸佛世界一
切衆生使其福德具足成就如天帝釋悉復
合集此衆生福如帝釋福爾乃及於一梵天

福復有別異江河沙等諸佛世界衆生之類其福各各譬如梵天悉備具足是諸衆生其福各各等如梵天合集此福以爲成一聲聞之福復有別異江河沙等諸佛世界衆生之類各各功德如聲聞者悉合此福令具足備爾乃合爲一緣覺福復有別異江河沙等諸佛世界一切衆生其福如緣覺者悉備具足爾乃合爲一菩薩福菩薩之福則過於彼不可稱限假使逮得等集衆德三昧定者正使三千大千世界滿中衆生悉令逮得等集衆德三昧定者合集於此衆生三昧之德以爲一無罣礙祠無瑕之慧無想著慧是故鉤鎖如是比慧所可祠祀皆悉合集而爲法祠撰合斯福乃爲如來一大人相如是比類三十二相各各若茲乃成如來具足身相一切衆

化七

十七

生不能思議是故名曰不可思議如來之身百福之相佛說此百福功德大人相時三千大千世界六返震動其大光明普照世界而雨天華百千妓樂不鼓自鳴諸天世人怪未曾有踊躍欣喜各各叉手爲佛作禮舉聲而歎俱白佛言若族姓子其發無上正真道意爲得善利無極之慶乃當逮得如是之比百福之相悉具足備則爲超過釋梵四王一切聲聞及諸緣覺唯然世尊其有聞此等集衆德三昧快哉快哉爲得菩薩利若得聞名其德難及何況其人聞信樂奉行假使有人持是三昧所遊之處則爲擁護其土衆生今此經典所遊之處計其土地佛所建立假使世尊江河沙等諸佛世界滿其中火當入中過求聞是法聞是經者則歸大安世尊告曰如

是如是天子誠如所云假使有人聞是三昧而不信樂不能聞受為魔所困其有菩薩不得逮聞是三昧者亦不受持諷誦說者吾不名之為聞多智天子白佛惟佛世尊如來聖旨建立此法令於後世徧得宣布爾時世尊放眉間相及髻相光其光普照無量無邊諸佛世界尋其光明自然出聲而歎頌曰如來已為建立斯法爾時世尊告賢者阿難今吾不久當般泥洹餘有三月佛語阿難已為勸助吾囑累汝於此經典汝當受持為諸眾會廣分別說若有人及菩薩學持三昧則為其人佛不滅度法不滅盡所以者何其有阿難受行其法則為見佛若為眾會講論說者此為護法時賢者阿難淚出而白佛言唯然世尊願住一劫復過一劫多所慙傷多所哀念

化七

十八

多所安隱天上世間世尊告曰阿難且止莫憂勿愁向者吾不說乎具足是法者佛則永存亦復不離諸佛世尊所以者何不當以色觀如來也亦非相好若觀此法則為見佛佛說如是鉤鎖菩薩溥首菩薩離垢威菩薩及諸菩薩賢者阿難及大聲聞一切眾會諸天龍神捷沓愁世人阿須倫莫不歡喜稽首作禮

等集眾德三昧經卷下

音釋

陰擔陰於禁切擔丁紺切 陰陰於禁切 屠膾屠同都切膾古外詭居消切 屠膾屠同都切膾古外詭居消切 也也 痲痲胡加切 閫閫門限也 豐豐許觀切 寔寔其矩切 也也 沃沃烏酷切 獻獻俞芮切 棚棚蒲庚切 拯拯之肯切